

四庫全書

子部

欽定四庫全書

太平御覽卷十

宋 李昉等 撰

天部十

雨上

雨上

釋名曰雨羽也如鳥羽動則散

又雨水從雲下也雨者輔也言輔時而生養

說文曰零徐雨也霽

音斯

小雨裁落也霽

林本反

霖雨也南

陽名霖雨曰霰

音酸

小雨也霰

子廉反

微雨也霽

音資

雨聲

也溟小雨也澍時雨也滑

子八反

雨下也

易曰密雲不雨自我西郊

又匪寇婚媾往遇雨則吉

又雲行雨施又雨以潤之

書曰若歲大旱用汝作霖雨

又洪範休徵曰肅時雨若

又納于大麓烈風雷雨弗迷

詩曰有渰淒淒興雨祁祁雨我公田遂及我私

淖雲興貌淒淒

雲盛貌祁祁猶徐徐也

又月離于畢俾滂沱矣

月離陰星則雨

又我來自東零雨其濛鸛鳴於垤婦歎於室鄭玄注曰將陰則穴處者先知之鸛好水將雨長鳴而喜也

又習習谷風以陰以雨

禮記月令曰仲春之月始雨水孟春行夏令則雨水不

時行秋令則暴雨總至行冬令則水潦爲敗

又季春行夏令則時雨不降行秋令則淫雨早降

又時雨將降下水上騰

又立夏命有司祀雨師

又孟夏行秋令則苦雨數來

又六月中氣後五日大雨時行

又仲秋行春令則秋雨不降

又仲冬行秋令則天時雨汁沝瓠不成

又諸侯朝天子雨霑服失容則廢

又天降時雨山川出雲

又風雨不節則饑

又疾風迅雷甚雨則必變

傳曰隱公九年三月癸酉大雨

又宋大水魯莊公弔焉曰天作淫雨害于梁盛若之何不弔

又如百穀之仰膏雨焉

又雨三日以往爲霖

又大旱卜有事于山川不吉甯莊子曰昔周饑克殷而  
年豐今邢方無道欲使衛討邢焉從之師興而雨

又臧武仲如晉雨過御叔在其邑將飲酒御叔魯大夫曰焉

用聖人

武仲多智時人謂聖人也

公羊傳曰觸石而出膚寸而合

側手為膚布指知寸言無有膚寸而不合也

不崇朝而遍雨乎天下者惟泰山雲爾

穀梁傳曰春正月不雨不雨者勤雨也

欲雨之心勤也

夏四月不雨

一時言不雨者憫雨也

一時輒言不雨憂民之至

六月雨雨云者喜雨也

爾雅曰甘雨時降萬民以喜謂之醴泉

又暴雨謂之凍小雨謂之霖霖久雨謂之淫謂之霖  
易稽覽圖曰降陰爲雨降陰之雨潤而破塊

京房易飛候曰凡候雨以晦朔弦望雲漢四塞者皆當  
雨東風曰雷雨暴有黑雲氣如船覆于日下當雨有黑  
雲氣如斗牛彘當雨暴有異雲如水牛不三日大雨黑  
雲如羣羊奔如飛鳥五日必雨雲如浮船皆雨北斗獨



有雲不五日大雨四望見青白雲名曰天寒之雲雨微  
蒼黑雲細如杼軸蔽日月五日必雨雲如兩人提鼓持  
桴皆爲暴雨

又太平之時十日一雨凡歲三十六雨此休徵時若之  
應

尚書說曰淮雨

淮暴雨  
之名也

尚書大傳曰五岳雲皆觸石而出不崇朝而雨

又成王時有越裳氏來朝曰久矣天之無烈風東西南

北之無澍雨也

暴雨也

意中國有聖人乎

禮統曰雨者輔時生養均遍故謂之雨

大戴禮曰天地之氣和即雨

禮斗威儀曰君乘金而王其政象平則嘉雨時至

春秋說題辭曰一歲三十六雨天地之氣宣十日小雨  
應天文十五日大雨以斗運也

又陽制陰故水為雨

春秋元命苞曰陰陽和而為雨

春秋繁露曰木有變則春多雨此徃役聚賦歛重故也  
史記曰秦始皇時置酒而天雨陛楯者沾寒優旃見而  
哀之謂之曰汝欲休乎陛楯者曰幸甚優旃曰我即行呼  
汝疾應曰諾居有頃殿上上壽呼萬歲旃臨檻大呼曰  
陛楯郎郎曰諾優旃曰汝雖長何益徒雨立我雖短幸  
休居於是始皇使陛楯者得半相代  
又夫子嘗行命弟子持雨具既而果雨曰昨暮月不宿  
畢乎

范蔚宗後漢書曰高鳳字文通家貧好學不休其家曝麥  
令鳳守雞以竿授其手中鳳執竿讀書雨大至鳳讀書  
不覺執竿如故其妻還麥流甚以爲怒鳳亦不愧

後漢書曰郭林宗嘗于陳梁間行遇雨中一角墊時人  
乃故折角以爲林宗巾其見慕如此

謝承後漢書曰百里嵩字景山爲徐州刺史境旱嵩出  
巡遊甘雨輒澍東海祝其合鄉等三縣父老訴曰某等  
是公百姓獨不降乎迨赴雨隨車而下

東觀漢記曰王郎追光武自薊東南馳及至南宮遇大風雨乃引車入道傍舍馮異抱薪鄧禹爇火光武對竈燎衣

又順帝陽嘉元年立順帝烈皇后是時自冬至春不雨立后之日嘉澍沾渥

又沛獻王輔善京氏易永平五年京師少雨上御靈臺自為卦以周易林卜之其繇曰蟻封穴戶大雨時至上以問輔輔上書曰塞艮下爲山坎上爲水山出雲爲雨蟻

穴居知雨將至故以雨為興居

漢書名臣奏曰天陰雨人之病為之先動是陰相應而起也天將陰雨又使人睡卧者陰氣也

魏志曰曹真伐蜀從子午道司馬宣王沂漢水當會南鄭入諸軍或從斜谷道或從武威入會大霖雨三十餘日棧道絕斷詔真還

又太祖在長安使曹仁攻雲長于樊城秋大霖雨漢水溢平地水數丈于禁七軍皆沒

晉書曰詔以王雅爲太子少傅將拜遇雨請以繖入王  
珣不許因冒雨拜

後漢書曰樊英隱壺山有暴風從西南起英謂學者曰成  
都失火甚盛因含水西向嚙之乃令記其時日後有從  
蜀郡來者曰是日大火有雲從東起須臾大雨

神仙傳曰藥巴蜀人徵爲尚書入朝得酒不飲西南嚙  
之詔問已已曰臣本縣成都大火臣以酒爲雨救之帝  
驚驛問咸云是時雨從北來猶有酒氣

襄陽耆舊傳曰巫山神女朝為行雲暮為行雨

西京雜記曰董仲舒曰太平之時雨不破塊津莖潤枝而已

又董仲舒曰陰陽二氣之初蒸也若有若無若實若虛團攢聚合其體稍重乘虛而墜風多則合速故雨大而踈風少則合遲故雨細而密

湘州記曰零陵山有石燕遇風雨則飛止還爲石

王采安城記曰萍鄉西城津有玉女岡天當雨輒先涌五



色雲於石間俗謂玉女披衣

搜神記曰武王伐紂至河上雨甚疾雷晦冥揚波于河衆甚懼武王曰余在天下誰敢干志者風波立霽

述異記曰廬山有康王谷北嶺上有一城號劉城天每有雨輒聞山上有鼓角笳簫之聲村人常以爲候

武昌記曰武昌東南有金牛岡西有石鼓山上有三石鼓石鼓鳴天必雨

羅浮山記曰山有龜淵淵有神龜龜鼻貫銅鑠若有人

穢此淵即注雨

周處風土記曰榆莢雨

春雨

黃雀風濯枝雨

六月之風雨也

又六月有大雨名濯枝雨

荆楚歲時記曰六月必有三時雨田家以爲甘澤邑里相賀曰賀嘉雨

王子年拾遺記曰甘雨濛濛似露委草木則滴漑雨也又香雲成香雨

帝王世紀曰黃帝遊洛水上見大魚殺五牲以醺天乃

甚雨七日七夜魚流始得圖書今河圖是也

孔子家語曰將行遇雨不假蓋於子夏護其短也

又齊有一足之鳥集于殿前舒翅而跳齊侯異之使聘  
魯訪於孔子曰此鳥名曰商羊昔童兒有屈一脚振兩  
臂而跳且謠曰天將大雨商羊鼓舞今齊有之其應至  
矣急告民趣治溝渠修隄防將有大雨水爲灾果有霖  
雨水溢汎諸國傷害人民唯齊有備不敗景公曰聖人  
之言信而有徵矣

老子曰暴雨不終日

莊子曰宋景公時大旱三年卜云以人祀乃雨公下堂  
頓首曰吾所求雨者爲人今殺人不可將自當之言未  
卒天大雨方千里

又堯讓天下於許由由曰日月出矣而燭火不息其于光也  
不亦難乎時雨降矣而猶浸灌其于澤也不亦勞乎

文子曰若與俗處猶走逃雨也無之而不濡

列子曰赤松子神農時雨師也

廣成子曰黃帝時雲不待族而雨

尸子曰神農理天下欲雨則五日爲行雨旬爲谷雨旬五日爲始雨萬物咸利故謂之神雨

孟子曰油然作雲沛然下雨

抱朴子曰軍始發大風甚雨起于後大勝之徵也軍始出雨沾衣者是謂潤兵軍有功雨不足沾衣裳是謂泣軍必敗

又曰無雲而雨是謂雨血將軍當揚兵講武以應之雨

軍中尤甚者將軍戰必無功也

管子曰冬作土功發地藏則夏多暴雨秋霖不止

又曰春秋察五政一曰論幼孤赦有罪二曰賦爵列授祿  
位三曰脩溝洫復亡人四曰治封疆正阡陌五曰無殺  
麇卵無絕華萼五政徇時春雨乃來

淮南子曰失火遇雨禍中有福

又曰人莫鑑於沫雨而鑑於止水者以其淨也

沫雨雨潦上沫

起覆蓋也言其濁  
擾不見人形也

又曰朱鼃浮於水上必大雨

又曰天且雨也魚已噞噞

音宜  
臉反

又曰黑蜥神虬潛泉而居將雨而躍

蜥音  
麗

鄒子曰朱買臣孜孜脩學不覺雨之流粟

韓子曰荆人伐陳吳救之軍間三十里雨十日夜左史  
倚相謂子期曰雨十日甲輯兵聚吳人必至宜備之乃  
為陣未成而吳人至見荆有戒而反

傅子曰昔者伯牙子遊於泰山之陰逢暴雨止於巖下

援琴而鼓之為淋雨之音更造崩山之曲每奏鍾期輒窮其趣曰善哉子之聽也

孔叢子曰子思答縣子曰以子產仁愛譬夫子猶浸水之與膏雨夫浸所及則生不及則死民皆知焉膏雨之所生也廣莫大焉民之受賜也普矣莫識其由也

呂氏春秋曰武王伐紂至渭水紂使膠鬲候周師問武王曰西伯何時至曰將以甲子日至膠鬲行矣大雨日夜不休武王疾行不輟軍吏諫武王曰吾疾行以救膠



鬲之死也

揚子法言曰震風凌雨然後知夏屋之帡幪

震疾凌暴也夏大也

帡幪也  
幪覆也

廣雅曰雨師謂之屏翳

纂要曰疾雨曰驟雨徐雨曰零雨久雨曰苦雨亦曰愁霖雨晴曰霽雨水曰潦雨雲曰渰雲亦曰油雲

戰國策曰文侯與虞人期獵是日大雨文侯將出左右諫曰吾與虞人期獵不可失也乃往魏于是始強

易林變占曰雷公出裝隱隱西行霖雨不止流為江河  
周易集林雜占曰占天雨否外卦得陰為雨得陽不雨  
其爻發變得坎為雨得離不雨坎化為巽先雨後風  
博物志曰太公為灌壇令武王夢婦人當道夜哭問之  
曰吾是東海神女嫁與西海神童今為灌壇令當道廢  
我行我行必有大風疾雨大風疾雨是毀君之德也武  
王覺召太公問之果有疾雨暴風在太公邑外而過  
六韜曰武王問散宜生卜伐紂吉乎曰不吉鑽龜龜不

兆數著交加而折將行之日雨輶車至軫行之日幟折為三散宜生曰此卜四不祥不可舉事太公進曰是非子之所知也祖行之日輶車至軫是洗濯甲兵也

師曠占曰候月知雨多少入月一日二日三日月色赤黃者其月少雨月色青者其月多雨常以五卯日候西北有雲如羣羊者即有雨至矣冬戊己春辰巳日雨蝗蟲食禾稼立春雨傷五禾立秋日雨害五穀常以戊己日日入時出時欲雨日上有冠雲大者即多雨雲小者

少雨

天文要集曰北斗之傍有氣往往而黑狀如禽獸大如  
皮席不出三日必雨

又河有雲黑狀似船若一疋布維河不出十日大雨

又辰口守心有水灾一曰大雨不可當

又北斗者不欲雲覆之黑雲覆之大雨

范子計然曰風為天氣雨為地氣風順時而行雨應風  
而下命曰天氣下地氣上陰陽交通萬物成矣

劉義慶世說曰謝太傅無嗔喜曾送兄征西葬還日暮雨馭人皆醉不可處分公乃于車中手取車柱撞馭人聲色甚怒

劉義慶幽明錄曰河南人趙良與其鄉人諸生至長安至新安界遇霖雨糧乏相謂曰飢那得美食邪應時美飯備具有人聲語云進䟽食

黃子發相雨書曰常以戊申日候日欲入時日上有冠雲不問大小視四方黑者大雨青者小雨候日始出日

正中有雲覆日而四方有雲黑者大雨青者小雨四方有雲如羊豬雨立至四方北斗中有雲後五日大雨四方北斗中無雲唯河中有雲三枚相連狀如浴狶者三日大雨以丙丁辰之日四方無雲唯漢中有者六十日風雨和常以六甲之日平旦清明東向望日始出時日上青雲大小貫日中青者以甲乙日雨赤者以丙丁日雨白者以庚辛日雨黑者以壬癸日雨黃者以戊己日雨六甲日四方雲皆合者即雨以天方雨時視雲有五

色黑赤並見者即靛黃白雜者風多雨少青黑雜者雨隨之必滂沛流潦

又四方有濯魚雲遊疾者即日雨遊遲者雨少難至說苑管仲曰吾不能以春風風人夏雨雨人吾道窮矣又武王伐紂過隧則斬岸過水則沉舟示人無反志也至于有戎之隊大風折旆散宜生諫曰此其妖與武王曰非也天落兵也風霽而乘以大雨散宜生又諫曰此非妖與武王曰非也天洗兵也

風俗通曰雨師為玄冥

山海經曰羽山之上多雨符惕之山多怪雨

括地圖曰谷山有叢雲甘雨



太平御覽卷十

欽定四庫全書

太平御覽卷十一

宋 李昉等 撰

天部十一

雨下

祈雨

霽

雨下

河圖帝通紀曰雨者天之施也



遁甲開山圖曰霍山南岳有雲師雨虎

榮氏解曰雲師如蠶長六寸有

毛似兔雨虎如蠶長七八寸似蛭雲雨之時出在石上肉甘可熟而食

又鄭有不毛山上有無為之君分布雲雨於九州之內

榮氏曰不毛山不生樹木古無為君常處其上布灑雲雨九州之內平均

河圖秘徵曰君急恚怒無雲而雨

黃帝素問曰清陽為天濁陰為地地氣上為雲天氣下為雨雨出地氣雲出天氣

又天氣下而為雨

太公金匱曰武王師到牧野陣未畢而暴風疾雨電雷  
幽冥前後不見太公曰善雷電者是吾軍動應天也

太公陰符謀曰昔紂嘗以六月獵於西土西土之老少  
相與謀曰君王逆天此其命固不壽也後數日而暴風  
大雨發屋拔木漂殺人民六畜明年諸侯謀合四方兵  
起

又武王兵入商郊前歌後舞甲子進兵乙丑而雨

太公兵法曰將有三禮武王曰敢問三禮太公曰將冬

日不服裘夏日不操扇天雨不張幔蓋名將禮

太公對敵權變逆順法曰夫軍出逢天無雲而雨天泣也軍沒不還

魏武帝兵書按要曰大軍將行雨濡衣冠是謂灑兵其師有慶

又三軍將行其旗塾然若雨是謂天露三軍失徙將軍雨甚是謂浴屍先陣者敗亡

雜兵書曰諸雲氣諸變暈日月蝕風散之雲振之雨壓

之皆解

又大人之兵如虎如狼如風如雨如雷如震振振暝暝  
天下盡驚

又如軍營風雨從後來沾衣裳大吉

又有大雲雨軍內滂沱甚者軍罷無功

桓寬鹽鐵論曰孔子大聖也嘗居上位相魯三月不令  
而行不禁而止沛若時雨之灌萬物莫不興起也

王充論衡曰道至天者翔風起甘雨降霽而陰暄者謂

之甘雨非謂雨水味甘也

又太平之時五日一風十日一雨

又周公時雨不破塊風不鳴條旬而一雨雨必以夜丘陵高下皆熟

神異經曰西海上有人焉乘白馬朱鬣白衣赤冠從十二童子馳馬西海如飛名曰河伯使者其所至之國雨水滂沱

樂動聲儀曰焦明至爲雨備

焦明水鳥

楚辭曰雷填填兮雨冥冥

潘尼苦雨賦曰瞻中堂之浩汗聽長雷之淅淅

成公綏陰霖賦曰沉竈生鼃中庭運舟

傅咸愁霖詩曰舉足沒泥淖市道無行車蘭桂賤朽腐  
柴粟貴明珠

張孟陽雜詩曰雲根臨八極雨足灑四溟霖瀝過二旬  
散漫亞九齡堦下伏泉涌堂上水衣生尺燼重尋桂紅  
粒貴瑤瓊



又詩曰騰雲似湧煙密雨如散絲

劉楨詩曰和風從東來玄雲起西山夜中發此氣明旦  
飛甘泉

應璩與韋誕書曰夫以原憲懸磬之居而值皇天無已  
之雨室宇漸而作漏堂館洽而為泥

祈雨

禮記月令曰命有司為民祈祀山川百源大雩帝用盛  
樂乃命百縣雩祀百辟卿士有益於人民者以祈穀實

雩者祭祁雨之名  
大雩爲用盛樂也

漢書曰董仲舒爲江都相理國以春秋災異之變推陰陽所以錯行故求雨閉諸陽縱諸陰其止雨反是

范蔚宗後漢書曰諒輔仕郡爲五官掾時夏大旱太守自出禱山川連日而無所降輔乃自暴庭中慷慨呪曰輔爲股肱不能進諫納忠和調陰陽至令天地否隔萬物枯焦咎盡在輔今敢有所請若至日中不雨乞以身塞無狀於是積薪聚艾茅以自環搆火將自焚未及中時

天雲晦合須臾澍雨

謝承後漢書曰戴封字平仲遷西華令其年大旱禱請  
無獲乃積薪坐其上以自焚火起而大雨遽邇歎服遷  
中山相

又曰爰延轉議郎徐州遭旱延使持節到東海請雨豐  
澤應時與京師同日俱霈還拜五官中郎將

又曰周暢性仁慈為河南尹夏旱久禱無應因收葬洛  
城傍客死骸骨萬餘人應時澍雨歲乃豐稔

又章和元年有詔以鄭宏為大尉時旱朝廷百僚皆暴  
請雨夏炎熱小雨郡官即還舍宏彌日不旋大雨如注  
稼穡遂豐

又汝南周獲善占天文為郡門下掾鮑昱為汝南太守  
時郡境大旱昱自往問何以致雨獲曰急罷三部督郵  
明府當自北出到四十里亭雨可致也昱從之果得大  
雨每行縣輒軾其閭

東觀漢記曰曹褒為河內太守時自春至六月無雨穀

貴百姓頗流離褒到省吏職退去貪殘屢得澍雨其秋大熟百姓給足流民皆還

又和熹鄧后永初二年三月京師旱至五月朔太后幸雒陽省獄舉寃未還宮澍雨大降

司馬彪續漢書曰永初六年張奮代劉方為司空時歲灾旱祈雨無應乃表即時引見口陳時政之宜明日和帝召太尉司徒幸洛陽即大雨三日

蜀本紀曰秦王誅蜀侯惲後迎葬咸陽天雨三月不通

因葬成都故蜀人求雨祠蜀侯必雨

王隱晉書曰東晉太康中郡大旱苗稼敗晉乃命邑人躬共請雨三日中雨水三尺衆人以其有術數精誠於神明百姓歡喜爲之歌曰東先生通神明請天三日甘雨零我黍以萌我稷以生何以疇之報束長生

高閭燕志曰太平十五年自春不雨至於五月有司奏右部王荀妻產妖傍人莫覺俄而失之乃暴荀妻於社大雨普落

魚豢典略曰舊制求雨太常禱天地宗廟社稷山川已賽如其常祭牢禮四月立夏旱乃求雨立秋雖旱不禱求雨到七月必賽之秋冬春三時不求雨

崔鴻春秋前燕錄曰建熙七年五月慕容暉下書曰朕以寡德蒞政多違亢陽三時光陰錯緒農植之辰而零雨莫降其令有司徹樂大官以菜食常供祭奠既而澍雨

又前涼錄曰張植為西城校尉與奮威將軍牛霸率騎

救張冲六月至于流沙無水士卒渴甚植乃剪髮肉袒  
徒跣升壇慟泣請雨俄而雲起西北雨水成川植殺所  
乘馬祭天而去

又前秦錄曰沙公西域沙門也有秘術每旱苻堅常使  
呪龍龍便下鉢中天輒大雨

後魏書曰孝文太和二年京師旱祈天於北苑親自禮  
焉減膳避正殿澍雨大洽三年帝祈雨於北苑是日大  
澍雨



益都耆舊傳曰趙瑤為閬中令遭旱請雨於靈星應時大雨

葛仙翁傳曰吳主曾與仙翁坐於樹上望見道間人民請雨土人累時不得仙翁曰雨可得耳即書符著社廟中日午大雨尺餘水

長沙耆舊傳曰祝良為洛陽令時亢旱天子祈雨不得良暴身階庭告誡引罪紫雲沓起甘雨乃降

佛圖澄傳曰石虎時自正月至六月不雨澄詣滌口祠

稽首暴露即有二白龍降祠下於是雨遍數千里

干寶搜神記曰湯既克夏大旱七年洛川竭湯乃以身禱於桑林剪其髮自以為犧牲祈福於上帝於是大雨即至洽于四海

又湘東新年縣有一穴穴中有黑土歲旱人則共壅水於此穴穴淹則立大雨

宋永初山川記曰鄱陽長壽山山形似白馬雲出於鞍中不崇朝而雨

盛宏之荊州記曰宜都縣有一山獨立峻絕西北有石  
穴一獨行百步許二大石其間相去一丈許俗名其一  
為陽石其一為陰石水旱為灾鞭陽石則雨鞭陰石則  
晴

又湘東有雨母山山有祠壇每祈禱無不降澤以是名  
之

又耒陽縣有雨瀨此縣時旱百姓同壅之則甘雨普降  
若一鄉獨壅雨亦偏隨方所其信若符刻

顧微廣州記曰鬱林郡山東南有一池池邊有一石牛人祭祀之若百姓殺牛祈雨以牛血和泥泥石牛背祀畢則天雨大注

抱朴子曰使者甘宗所奏西域事云方士能神呪者臨泉禹步吹氣龍即浮出長數十丈更吹龍輒縮至長數寸乃掇取著壺中壺中或有四五龍以少水養之聞有旱處便賣龍往賣一龍數值千金發壺出龍著潭中復禹步吹之長數十丈須臾而雲雨四集

又歷陽有彭祖仙室請雨必得

晏子春秋曰齊景公時旱欲祠靈山晏子曰山以石為身草木為髮天苟不雨髮焦身熱獨不欲雨乎祠之何益公曰祠河伯可乎曰河伯以水為國以魚鼈為民久旱國將亡民將滅獨不欲雨乎君避殿暴露其索雨乎公出野暴露天果大雨

淮南子曰土龍致雨許慎註曰湯遭旱作土龍以象雲從龍也

又董仲舒請雨秋用桐木魚

山海經曰東荒北隅有山名土丘應龍處南極殺蚩尤與夸父不得復上故下數旱旱而為應龍之狀乃得大

雨

今之土龍  
本此也

遁甲開山圖曰絳北有陽石山有神龍池黃帝時遣雲陽先生養於此帝王歷代養龍之處國有水旱不時即祀池請雨

爾雅孫炎註曰攝木生江上有奇枝高三四丈生毛一

名楓子天旱以泥塗之即雨

傳咸自叙曰太始九年自春不雨涉夏節聖皇勞慮分  
使祈禱余以太子洗馬兼司徒祈越三朝雨大降退作  
喜雨賦

霽

說文曰霽雨止也霽雨霽也霽

火節反

雨止雲罷貌

魏略五行志曰延康元年大霖雨五十餘日魏有天下  
乃霽魏將受祚之應也

晉中興徵祥記曰咸和四年陰霖五十餘日蘇峻滅乃霽

長沙耆舊傳曰文度字仲儒為郡功曹吏時霖雨廢人業太守憂悒占度補戶曹度奉教齋戒在社三日夜夢白頭翁謂曰爾來何逢翌旦度具白所夢於太守曰昔禹夢青繡文衣男子稱蒼水使者禹知水脉當若是椽此夢將若此也明果大霽

扶南日南傳曰金陳國入四月便雨六月乃止少有晴



日六月不雨常晴歲歲如此

太平御覽卷十一

欽定四庫全書

太平御覽卷十二

宋 李昉等 撰

天部十二

雪

霰

露

雪

釋名曰雪綏也水下遇寒綏綏然下也

詩曰北風其涼雨雪其雱

又上天同雲雨雪雰雰

雰雰雪貌也豐年之冬必有積雪

又昔我往矣楊柳依依今我來思雨雪霏霏

又蜉蝣掘閱麻衣如雪

禮記孟春行冬令則水潦爲敗雪霜大摯

傳曰隱公九年三月庚辰大雨雪凡平地尺爲大雪

三月今正

月也大雪失時也

又楚子次于乾谿雨雪王皮冠秦復陶

秦所遺羽衣也

翠被豹

烏執鞭以出

易通卦驗曰乾得坎之蹇則當夏雨雪

詩推度災曰逆天地絕人倫當夏雨雪

大戴禮曰天地積陰溫則爲雨寒則爲雪

春秋元命苞曰陰揚而爲雪

史記曰東郭先生久待詔公車貧困饑寒衣弊履不完  
行雪中履有上無下足盡踐地道中人笑之

漢書曰漢女者居東海養姑姑女讒之於姑姑詣太守

訴而殺之五月下雪

又蘇武使於單于幽武置大窖中絕不與飲食天雨雪武卧齧雪與氊毛并咽之數日不死匈奴因以爲神又壺廣鞬單于自將領萬騎擊烏孫會天大雪一日深丈餘人民畜產凍死

續漢書曰赤眉入安定北地逢大雪坑谷皆滿多凍死晉書曰王恭衣鶴氅雪中行時人謂之神仙中人

又太傅謝安雪驟降公欣然曰白雪紛紛何所似兄子

客兒曰撒鹽空中差可擬兄女道韞曰未若柳絮因風起

又東瀛公騰

公姓司馬名騰

伐石勒於常山屯營時天大雪有

一處方數丈融液怪而掘之得一玉馬高尺許以為晉家之瑞

晉朝雜事曰太康七年河陰雨赤雪二頃

宋書曰大明中元日雪花降殿庭右將軍謝莊下殿雪  
暴衣白上以爲嘉瑞羣臣皆作雪花詩

崔鴻北涼錄曰先酒泉南有銅駝山言犯者大雨雪沮渠  
蒙遜遣工取之得銅萬觔

宋齊語曰孫康家貧常映雪讀書

唐書曰郭元振爲安西大都護時西突厥首領烏質勒  
部落強盛款塞通和元振就其牙帳計會軍事時天大  
雪元振立於帳前與烏質勒言議須臾雪深風凍元振  
未嘗移足烏質勒年老不勝寒苦會罷死焉

錄異傳曰漢時大雪積地丈餘洛陽令自出案行見民

家皆除雪出有乞食者至素安門無有行路謂安已死  
令人除雪入戶見安僵卧問何不出安曰大雪人皆餓  
不宜干人令以爲賢舉爲孝廉

韓詩外傳曰凡草木花多五出雪花獨六出雪花曰霙

英音

皇甫謐高士傳曰世莫知焦光所出野火燒其廬光因  
露寢冬雪大至光袒卧不移人以爲死就視知生

穆天子傳曰日中大寒北風雨雪有凍死人天子作黃



竹詩三章以哀之曰我徂黃竹負閼寒

閼閉也  
音秘

又雨雪天子獵於鉏山之西河

漢武內傳曰西王母曰仙之上藥有玄霜絳雪

烈士傳曰左伯桃羊角哀相與爲死友聞楚王好士欲  
往仕之道遇雨雪計不俱全乃併衣糧與角哀入樹而  
死

陸機別傳曰機誅日平地尺雪時人以爲冤

曹攄別傳曰攄爲洛陽令于時大雪而宮門夜忽失行

馬攄曰此非他竊理可保明必是門士以療寒驗之而具服

王子年拾遺記曰穆王東至大嶽

音奇

之谷西王母來進

嶠

丘儼反

州甜雪嶠州去玉門三十萬里地多寒雪霜露

著木石之上皆融而甘可以為菜也

又周靈王起昆昭之臺招致神異有二人乘游龍飛鳳之輦王迎之上席時天旱地裂其一人先倡能為霜雪王乃請焉於是引氣一吸則雲起雪飛

又廣延之國去燕七萬里在扶桑東其地寒盛夏之日  
冰厚至丈常雨青雪冰霜之色皆如紺碧

沙洲記曰自龍涸至大浸川一千九百里夜肅肅常有  
風寒七月雨便是雪遙望四山皓然皆白

西京雜記曰董仲舒曰太平之世雪不封條凌弭毒害  
而已

莊子藐姑射之山有神人居焉容膚若冰雪綽約若處  
子

曾子曰陰氣勝則凝雪

孟子曰滕文公卒葬有日矣天大雨雪至牛目羣臣請弛期太子不許惠公諫曰昔王季葬渦山之尾灤水齧其墓見棺前和文王曰先君欲見羣臣百姓矣乃出爲帳三日而後葬今太子亦宜白先王欲少留而撫社稷故使雪甚弛期而更爲日比文王義也太子曰善又齊宣王見孟子於雪宮王曰賢者亦有此樂乎孟子曰爲民上而不與民同樂者亦非也

晏子春秋曰景公時雨雪三日公被狐白之裘見晏子  
公曰怪哉雨雪三日不寒晏子曰古之賢君飽而知人  
饑溫而知人寒公曰善乃脫裘發粟以與饑寒者

秦子曰今欲騁光日下顯白雪中不可得也

孫子曰昔衛君重裘累茵而坐見路有負薪而哭之者  
問何故也對曰雪下衣薄是以哭之於是衛君懼見於  
顏色曰為君而不知民孰以我為君於是散府金出倉  
粟以賑貧

淮南子曰欲滅迹而走雪中

金匱曰武王伐紂都洛邑陰寒雨雪十餘日深丈餘甲  
子平旦不知何五大夫乘馬車從兩騎止門外王使太  
師尚父謝五大夫賓幸臨之失不先聞方修法服太師  
尚父使人持一器粥出進五車兩騎曰走生大夫在內  
方對天子寒故進熱粥却寒粥皆畢使者具以告尚父  
尚父問武王曰客可見矣五車兩騎四海之神與河伯  
雨師耳王曰不知其名尚父曰南海神曰祝融東海神

曰勾芒北海曰玄冥西海曰蓐收河伯雨師請使謁者  
於殿下門內以名召之神皆驚相視而歎

語林曰王子猷居山陰大雪夜開室命酌四望皎然因  
詠招隱詩忽憶戴安道時在剡乘興棹舟訪之經宿方  
至既造門而返或問之對曰乘興而來興盡而返何必  
見戴安道

汜勝之書曰取雪汁漬原蠶屎五六日待澤手按之和  
穀種之能御旱故謂雪為五穀之精也

山海經曰由首之山小咸之山空桑之山冬夏有雪  
論衡曰雲霧雨之徵也夏則為露冬則為霜溫則為雨  
寒則為雪雨露凍凝者具由地發不從天降

琴操曰曾子耕太山下雨雪不得歸思父母作梁山操  
廣志曰雲南郡四月猶積皓雪代郡至五月山陰猶宿  
雪八月末復雪

宋玉對問曰客有歌於郢中始曰下里巴人國中屬而  
和者數千人及為陽春白雪國中屬而和者不過數十



人是故其曲彌高其和彌寡

宋謝惠連雪賦曰歲將暮時既昏寒風積愁雲繁梁王  
不悅遊於兔園乃置旨酒命賓友召鄒生延枚叟相如  
未至居客之右俄而微霰零密雪下王乃歌北風於衛  
詩詠南山於周雅相如於是避席而起逡巡而揖曰臣  
聞雪宮建於東國雪山峙於西域岐昌發詠於來思姬  
滿申歌於黃竹曹風以麻衣比色楚謠以幽蘭儷曲盈  
尺則呈瑞於豐年表丈則表沴於陰德其為狀也散漫

交錯氛氲蕭索藹藹浮浮漣漣奕奕聯翩飛灑徘徊委  
積始緣薨而冒棟終開簾而入隙既因方而爲珪亦遇  
圓而成璧眇隰則萬頃同縞瞻山則千巖俱白於是臺  
如重壁遠似連璐庭列瑤階林挺瓊樹皓鶴奪鮮白鷗  
失素

楚辭九辯曰雪霰紛糅

女救反

又覓兮來歸兮北方不可止些層冰峨峨飛雪千里些

峨鮮

苛反

又霰雪紛其無垠此雲霏霏承宇此

司馬相如美人賦曰時既西些元陰晦冥涼風蕭然素

雪飄零

伏元之雪賦序曰結陰凝雪皎如帔素

謝靈運詩曰明月照積雪朔風勁且哀

樂府歌詩曰皚如山上雪皎如雲間月聞君有兩意故

來相決絕

庾肅之雪讚曰皎如天漢色踰玉粲

李顥悲四時曰雲霰

徒敢反

霰對

徒對反

以時興雪聯翩而聚

密枯林皦如瓊翰空岫即若玉室

王昭之詠雪離合曰霰先集兮雪霏霏散空中兮被簷  
庭曲室寒兮朔風厲川陸涸兮百籟鳴

霰

釋名曰霰星也冰雪相搏

補各反

如星而散

說文曰霰積雪也從雨散聲

詩曰如彼雨雪先集維霰

爾雅曰雨霰爲消雪

郭璞注云霰冰雪雜下故謂消雪

又雨雪相和爲霰

尚書洪範五行傳曰盛陰雨雪凝滯而冰寒陽氣薄之不相入則散而爲霰故沸湯之在閉器而湛於寒泉則爲冰及雪之消亦水解而散此其驗也

韓詩薛君注曰霰霰也

曾子曰陰之專氣爲霰

露

釋名曰露慮也覆慮物也

許慎說文曰露潤澤也從雨路聲

詩曰厭

於接反

浥行露豈不夙夜謂行多露

又蒹葭蒼蒼白露爲霜

又湛湛露斯匪陽不晞

又野有蔓草零露漙漙

徒官反

兮

又野有蔓草零露瀼瀼

如章反

禮曰立秋後十五日白露降

又季冬行秋令則白露早降

又天不愛其道故天降甘露

又春雨露既濡君子履之必有怵惕之心焉如將見之

感時  
念親

又王所以爲順而弗悖也天降甘露

易通卦驗曰立秋白露下

尚書中候曰堯時甘露降

詩含神霧曰陽氣終白露為霜

宋均曰白露行露也陽終陰用事故曰白露凝

爲霜也

大戴禮曰露陰陽之氣也夫陰氣勝則凝為霜雪陽氣勝則散為雨露

禮斗威儀曰君治政則軒轅之精散為甘露

春秋繁露曰恩及於物順於人而甘露降

春秋序曰桀無道露冬下

春秋元命苞曰霜以殺木露以潤草

又陰陽散為露



五經通義曰和氣津液凝為露露從地出

吳越春秋曰子胥諫吳王王怒暮歸舉衣出宮宮中羣臣皆曰天無霖雨宮中無泥相君舉衣行高何為子胥曰吾以越諫王王心迷不聽吾言宮中生草棘霧露沾吾衣羣臣聞之莫不悲傷

漢書曰宣帝元康元年甘露降未央宮大赦天下

後漢書曰桓帝永康元年秋八月魏郡言嘉禾生甘露降

謝承後漢書曰吳郡沈豐爲零陵太守至官一年甘露降膏潤草木

范蔚宗後漢書曰明帝永平十七年夢見先帝光烈皇后夢覺悲不能寐明旦上陵其日甘露降於陵樹帝令百官採之帝伏御牀流涕也

又成帝幸河東祠后土甘露降京師

東觀漢記曰光武時甘露降四十五里

魏志曰明帝鑄承露盤莖長一十二丈銅龍繞其根立

於芳林園甘露乃降

又明帝與東阿王詔曰昔先帝時甘露屢降於仁壽殿  
前靈芝生芳林園中自吾建承露盤已來甘露復降於  
芳林園仁壽殿前

晉書曰皇甫謐幼時有甘露降其柳樹謐母以食之謂  
蜜也

晉中興書曰王者敬養耆老則甘露降於松栢尊賢容  
衆則芹藂受之甘露者仁澤也其凝如脂其美如飴

宋書曰文帝元嘉中甘露頻降狀如細雪

隋書曰李德林趙郡柏人人也性至孝丁父憂單縗徒跣後甘露降其樹白鳩巢其廬

豫章耆舊傳曰太守陳蕃臨郡二年甘露降

汝南先賢傳曰新蔡鄭敬都尉高懿廳前槐樹有白露類甘露懿問掾屬皆言是甘露敬曰明府德政未致甘露但樹汁耳懿不悅因稱疾而去

洞冥記曰勒畢國人長三寸有翼善言語戲笑因名語

國飲丹露為漿丹露者曰初出有露如珠也

又東方朔遊吉雲之地漢武帝問朔曰何名吉雲曰其國俗常以雲氣占吉凶若占樂之事則滿室雲起五色照著於草木皆成五色露露味甘帝曰吉雲五色雲可以得否朔乃東走至夕而還得元黃青露盛之琉璃器以授帝帝遍賜羣臣得露嘗者老者少疾病皆愈又元封二年數過國獻能言龜一頭長一尺二寸東方朔曰唯承樹露以飲之

王子年拾遺記曰崑崙山有甘露望之色如丹著木石  
赭然如朱雪灑焉以瑤器承之如飴

周處風土記曰白鶴性警至八月露降流於草上滴滴  
有聲則鳴

述仙記曰八月一日作五明囊盛取百草頭露以之洗  
眼眼明也

老子曰天地相合以降甘露人莫之令而自均

出書林  
事類

莊子曰姑射之山有神人焉不食五穀吸風飲露

鵲冠子曰聖德上及太清下及太寧中及萬靈則膏露

下

蘇子曰夫子殆若露之託桐葉耳其與幾何

呂氏春秋曰伊尹說湯曰水之美者有三危之露

三危西極

山和之美者揭雱之露其色紫

淮南子曰方諸取露於月

高誘曰方諸陰燧也

東方朔神異經曰西北海有人長二千里兩脚中間相

去千里腹圍一千六里但日飲天酒五斗

張華云天酒甘露也

又黃父以霧露為漿

古史考曰太古之初民吮露精食草木實

劉向說苑曰吳欲伐荆王令曰敢有諫者死舍人有少孺子者欲諫懷彈於後園露霑其衣如是三朝王曰子

求何苦露霑衣如是對曰園中有樹其端有蟬蟬高居

悲鳴飲風噓露不知蟬蛭在其後曲跼

方無反

欲取其蟬

而蟬蛭又不知黃雀居其後延頸欲啄之然黃雀又不  
知臣操彈丸在其下臣但捕其黃雀不覺露霑衣此者



爲窺其利而不思其後患王聞之遂不伐荆

又騰蛇遊於霧露千里不止

漢武帝故事曰帝作金莖擎玉杯以承雲表之露擬和玉屑服之以求仙

又作銅承露槃上有仙人掌以承露也

蔡邕月令章句曰露者陰液也釋爲露凝爲霜

白虎通曰甘露者美露也降則物無不盛

又露者霜之始寒即變爲霜

論衡曰甘露味如飴王者之應則降

地鏡圖曰視山川多露無霜其下有美玉

徐整長歷曰北斗當崑崙山氣運注天下春夏為露

崔豹古今注曰薤露喪歌言人命如薤上露易晞滅也

其一章曰薤上露何易晞露晞明朝更復落人死何時

歸

瑞應圖曰露色濃甘者謂之甘露王者施德惠則甘露

降其草木

又甘露者美露也神靈之精仁瑞之澤其凝如脂其甘如飴一名膏露一名天酒

又王者德至於天和氣感則甘露降於松栢

山海經曰軒丘降甘露人常飲之

又諸沃之野搖山之民甘露是飲不壽者八百歲

列星圖曰天乳一星在氐北主甘露占若明而潤則甘露降不然則否也

楚辭曰朝飲木蘭之墜露夕餐秋菊之落英


張衡奏事曰飛塵增山霧露增海

曹植魏德論曰玄德洞幽飛化上蒸甘露以降蜜淳水  
凝覩暘弗晞瓊爵是承獻之帝朝以明聖徵

曹植承露盤銘叙曰夫形能見者莫如高物不朽者莫  
如金氣之清者莫如露盛之安者莫如盤乃詔有司鑄  
銅建承露盤于芳林園

束皙集曰薄冰凝池非宗廟之寶零露垂林非綴冕之  
飾

張載羽扇賦曰濯以雲精拂以芝露



太平御覽卷十二

欽定四庫全書

子部

太平御覽卷十三  
五

詳校官侍讀學士<sub>臣</sub>沈咸熙

員外郎<sub>臣</sub>牛稔文覆勘

總校官降調編修<sub>臣</sub>倉聖脈

校對官中書<sub>臣</sub>秉文邵

膳錄監生<sub>臣</sub>歐陽愛

欽定四庫全書

太平御覽卷十三

天部十三

霹靂

宋 李昉等 撰

雷 電 雷 電 雷 電 雷 電

釋名曰雷者如轉物有所碾音雷之聲也

說文曰霆雷餘聲鈴鈴所以挺出萬物

易曰雷電皆至豐君子以折獄致刑

又震爲雷

又動萬物者莫疾乎雷

又鼓之以雷霆

又存慈見反雷震君子以恐懼修省

又震來虩虩許逆反

又雷出地奮豫先王以作樂崇德



又雷電噬嗑先王以明罰勅法

又雲雷屯君子以經綸

又雷在地中復先王以至日閉關商旅不行后不省方  
又天地解而雷雨作雷雨作而百果草木皆甲坼

又震驚百里驚遠而懼邇也

又雷以動之

又雷雨之動滿盈

又雷風不相悖

又雷風相薄

又澤中有雷隨君子以嚮晦入宴息

書曰納于大麓烈風雷雨弗迷

詩曰殷其雷在南山之陽

又曰虺虺其雷

禮曰仲春日夜分雷乃發聲先雷三日奮鐸以令兆民

曰雷將發聲有不戒其容止者生子不備必有凶灾

主戒

婦人有娠者容止猶動靜

又曰君子若有疾風迅雷甚雨則必變雖夜必興衣服

冠而坐

謂敬天之怒

又曰秋分之日雷始收聲

傳曰藏冰以時則雷出不震棄冰不用則雷不發而震  
穀梁傳曰陰陽相薄感而爲雷激而爲霆

爾雅曰疾雷爲霆郭璞注曰疾雷謂雷之急激者

論語曰迅雷風烈必變

京房易傳曰當雷不雷陽德弱也

又曰五星占雷電殺人何雷天拒難折衝之臣也君承用節度即雷以節暴人威福則雷電殺人

易妖占曰天冬雷地必震教令撓則冬雷民饑

書洪範曰雷於天地爲長子以其首長萬物與其出入也雷出地百八十三日而復入入則萬物亦入入地百八十三日而復出出則萬物亦出此其常經也

又曰秦二世元年天無雲而雷雷陽也雲陰也有雲然後有雷象君臣也故雲雷相託陰陽相合也今二世不

恤人人臣叛之故無雲而雷也

又曰凡大風雷雨爲不敬也

又曰春後十日雷乃發聲

又曰正月雷微動而雉雊

又曰夫雷人君相也入能除害出能興利

尚書中候曰秦穆公出狩天震大雷下有火化爲白雀  
銜丹書集公車

大戴禮夏小正曰雷震雉鳴雉鼓其翼也正月必雷不

必聞唯雉必聞之

春秋元命苞曰陰陽合爲雷

春秋合誠圖曰軒轅星主雷雨之神

論語識曰雷震百里聲相附宋均注云雷動百里故因以制國也雷聲謂諸侯之政教所至相附也

史記曰高祖母劉媪常息大澤之陂夢與神遇是時雷電晦冥太公往視見蛟龍於其上已而有娠遂產高祖漢書曰迅雷妖風怪雲變氣此皆陰陽之精本在地而

上發于天

續漢書曰桓帝建和三年六月己卯雷震憲陵寢室是時梁太后聽兄冀誅李固杜喬

晉書曰晉人王裒母生時畏雷至母終後天雷輒繞墓曰裒在此裒在此

齊書曰永明八年六月十日晡時雷有黃光照地狀如金色占曰人君有德或謂之榮光

周裴汝南先賢傳曰蔡順母平生畏雷自亡後每有雷

震順輒環塚泣曰順在此

韓詩外傳曰東海之上有勇士曰菑丘訢

音訢

以勇游于

天下過神淵飲馬馬沈訢去朝服拔劍而入三日三夜殺二蛟一龍而出雷神擊之十日十夜眇其左目

王歆孝子傳曰竺彌字道綸父生時畏雷每至天陰輒馳至墓伏墳哭有白兔在其左右

搜神記曰義興人姓周永和中出都日暮路傍小屋中有女子留宿一更後有喚阿香者女應諾喚者曰官喚女推雷車



女遂辭周云有官事須去俄而大雷既明周自異其處  
返尋惟見一新塚塚上有馬跡

東方朔神異經曰八方之荒有石鼓其徑千里撞之其  
音即雷也天以此爲喜怒之威

盛宏之荊州記曰朝陽縣樊重母畏雷重爲母立石室  
以避之悉以文石爲階砌至今猶存

孟輿北征記曰凌雲臺南角一百步有白石室名曰避  
雷室

又曰臨賀有石方十二丈有磨刀斧跡春夏常明淨其迹甚新秋冬則苔穢故爲雷公磨石

莊子曰陰陽交爭爲雷

文子曰夫耳調金石之音而不聞雷霆之聲目察秋毫之末而不見太山之形小有所戀大有所忘

曾子曰陰陽之氣俱則爲雷

淮南子曰陰陽相薄感而爲雷

又陰不祥之木爲雷霆所撲

又庶女呌天雷電下擊景公臺殞支體傷折海水大出  
庶賤之女齊之少寡婦人也無子不嫁事姑謹敬姑無男有女女利母財令母嫁婦婦終不肯女殺母以誣寡婦婦不能自明冤結叶天天爲作雷電下擊景公之臺殞壞之也傷毀景公支體水爲之溢

又雷霆之聲可以鐘鼓寫也風雨之變可以音律和也  
抱朴子曰雷天之鼓也

鵠冠子曰昔者有道之君取政非取于耳目也夫耳之  
生聽目之生明兩葉蔽目不見太山兩豆塞耳不聞雷  
霆

孫子曰掣電無停光疾雷無餘聲

河圖帝通紀曰雷天地之鼓

河圖曰玉虎晨鳴雷聲也

又黃帝以雷精起

六韜曰武王伐紂雨甚雷疾武王之乘雷震而死周公曰天不祐周矣太公曰君秉德而受之不可如何也

伏侯古今注曰成帝建始四年無雲而風天雷如擊連鼓音可四五刻隆如車聲

山海經曰獫

音次

之山有鳧名橐蜚服之不畏電

肥音匪

備三音

又飛魚如豚赤文無羽食之辟兵不畏雷

師曠占曰春雨初起其音恪恪霹靂者所謂雄雷旱氣也其鳴依依音不大霹靂者謂之雌雷水氣也

又春分有音如雷非雷音在地中其所住者兵起其上無雲而雷名曰天狗行不出三年其國亡

又初雷從金門起上田旱下田熟一曰歲終兵革起

風俗通曰雷不蓋瞽俗說令人腹中雷鳴

世說曰曹爽將誅夢二虎御雷公若二升碗放著中庭  
華陽國志曰曹公從容謂先主曰天下英雄唯使君與  
操耳本初之徒不足數也先主方食失匕箸會雷大震  
先主曰聖人言迅雷風烈必變良有以也一震之威乃  
可致此曹公亦悔失言

酈炎對事曰或曰雷震驚百里何以知之炎曰以其數  
知之夫陽動爲九其數三十六陰靜爲八其數三十二

一陽動二陰故曰百里雷

雜兵書曰雷電霹靂破軍中樹木屋舍者徙去吉也雷電風所從來不可逆而伐宜慎之也

物理論曰積風成雷

王充論衡曰子路感雷精而生尚剛好勇親涉衛難結纓而死孔子聞而覆醢每聞雷鳴則中心惻怛亦復如之故後人忌焉以爲常也

又盛夏之時雷電疾擊殺人謂之有陰過飲食不潔則

天怒殺之隆隆之聲天怒之音也此虛言也道士劉春  
楚王英使食不潔春死必遇雷也建武四年六月夏雷  
擊會稽鄞魚巾反縣羊五頭羊有何陰過而雷擊之乎俗  
以爲天取龍殺人罰陰過與取吉凶不同非實道也

又圖畫之工圖雷之狀纍纍如連鼓形於其旁別畫一  
人狀貌若力士之容謂之雷公使之左手引連鼓右手  
推之世人信之莫不謂然始復原之虛妄之象也

霹靂



釋名曰霹靂折也震戰也所擊輒破若攻戰也

說文曰震霹靂折物也

穀梁傳曰疾雷為霆霓為急雷為霹靂

爾雅曰疾雷為霆霓

郭璞曰雷之急激者為霹靂

春秋繁露曰王言下不從則金不從革而秋多霹靂霹靂者金氣其音商故應霹靂

五經通義曰震與霆皆霹靂也

晉安帝紀曰義熙二年六月震太廟鴉尾徹壁柱若有

文字

晉朝雜事曰元康七年霹靂破城南高禰神石中宮求子祠也賈后將誅之應

曹嘉之晉紀曰諸葛誕以氣量稱常倚柱讀書霹靂震其柱誕自若

列女後傳曰河南李叔卿為功曹應舉孝廉同時應人害之使婢宣言叔卿淫其寡妹同舉人詣尹以骨肉相奸不合應孝廉叔卿杜門自絕女妹傷被淫之名遂到

府門自殺叔卿亦自殺明已無憊也後三年霹靂害叔卿者以其死屍置叔卿冢前其家收而葬之秋又震發其塚

玄中記曰玉門之西有一國國中有山山上有入歲歲

出石磻

字林反

數千輪廟中名曰霹靂磻給霹靂用從春

雷出磻日減至秋而盡

搜神記曰扶風楊道和于田中霹靂擊之道和以鋤格折其左股遂落地不得去色如丹目如鏡角長三尺狀

如六畜似獼猴

續搜神記曰吳興人章荀者五月中于田耕以飯蘿置

菰裏晚于菰中伺之見一大蛇偷其食食荀即以鉦

少悲

切斫之蛇便走去荀乘船逐之至一坂有穴蛇便入穴

但聞號哭云人斫傷某甲或云當如何或云付雷公令

霹靂殺奴須臾雲雨冥合震電傷荀荀于是跳梁大罵

云天公我貧窮展力耕墾蛇來偷食我飯罪在蛇反來

霹靂我是無知雷公若來當以鉦斫汝腹破須臾雲雨

輒開乃更霹靂向穴中諸蛇死者數十

莊子曰陰陽錯行天地大駭於是有雷有霆

劉義慶世說曰夏侯玄字太初嘗倚柱讀書時暴雨霹靂破所倚柱衣服焦然玄神色無變讀書如故

異苑曰狒狒虜凶虐暴忍常自言國名狒狒則是狒中之狒尋被震而死既葬而後就塚中霹靂其柩引身出題背四字表其凶逆而然也

又滕放太元初夏枕文石枕卧忽暴雨雷震其枕枕四

解傍人莫不怖懾而放微覺有聲不足為驚

又元嘉十九年京口霹靂殺人亦自題背

世說曰王丞相見郭景純君可試為作一卦卦成郭意  
惡云公有震厄王問可有消伏理否郭曰公能命駕西  
出數里得一栢樹截短如公長置寢處灾可消王悉依  
其言數日中果震栢樹碎門內子弟皆稱慶

桓譚新論曰天下有鸛鳥羣國皆食之三輔俗獨不敢  
取之或取即雷霹靂起原夫天不獨左彼而右此殺鳥

適與雷遇耳

博物志曰九真有狸牛出谿上或關岸上家牛皆怖或遮捕即霹靂號曰神牛

山海經曰半石之上有草名曰加榮服之不畏霆

琴操曰楚膏梁子出遊九皐之澤覽漸水之臺張晨置

罟于荆山臨曲池而漁疾風實

音殞

電雷電奄冥天火四

起霹靂下臻玄鶴翔其前白虎吟其後乃援琴而歌作

霹靂引

正論曰俚語云州縣符如霹靂得詔書但掛壁

電

釋名曰電殄也乍見則滅也

說文曰電陰陽激耀也從雨甲聲

易曰離為電

又曰雷電皆至豐君子以折獄致刑

詩曰熒熒震電

傳曰隱九年三月癸酉大雨震電



易稽覽圖曰陰陽和合為電輝輝也其光長

春秋元命苞曰陰陽激為電

史記天官書曰電者陰陽之動也

帝王世紀曰黃帝有熊氏母曰附寶有螭音喬氏之女也

見大電光繞北斗樞星照郊野感附寶而孕

漢書李尋傳曰尋說王根曰竊見往者盛冬電潛龍為  
孽

晉書曰王戎幼而穎悟神彩秀徹視日不眩裴楷目之

曰我眼爛如巖下電

神異經曰東王公與玉女投壺梟而脫悞不接者天為之笑開口流光今雷是也

漢武內傳曰西王母曰東方朔為太山仙官太仙使至方丈坐三天司命朔但務山水遊戲擅弄雷電激波揚風風雨失時

西京雜記曰董仲舒曰太平之世電不賁

許絹反

目宣示

光輝而已

莊子曰陰氣伏于黃泉陽氣上通于天陰陽分爭故為電

文子曰腎為電主鼻

曾子曰陰陽交則電

抱朴子曰良將去如收電可見不可追立如丘山可瞻不可動

淮南子曰電以為鞭策

電擊氣也

物理論曰風清熱之氣散為電

揚雄河東賦曰奮電鞭駟雷輜鳴洪鐘建五旗

楚辭曰凌驚雷軼駭電

張衡思立賦曰凌驚雷之硠

苦浪反

礧

苦大切

兮弄狂電之

淫裔

傅立詩曰童女掣電

太平御覽卷十三